




ԴԻՊԼՈՄԱՅԻՆ ԱՇԽԱՏԱՆՔՆԵՐԻ ՊԱՇՏԱՊԱՆՈՒԹՅՈՒՆ ԵՎ ՎԿԱՅԱԿԱՆՆԵՐԻ ԲԱՇԽՄԱՆ ՀԱՆԴԵՍ ՀՈԳԵՎՈՐ ՃԵՄԱՐԱՆՈՒՄ

Ապրիլի 2-ին, հինգշաբթի օր, ժամը 3-ին, Վեհափառ Հայրապետի բարձր նախագահությամբ տեղի ունեցավ 1961—1962 ուսումնական տարվա շրջանավարտների բարեշնորհ Զոհրապ սարկավազ Շամլյանի և բարեշնորհ Կարպիս սարկավազ Սարայդարյանի դիպլոմային աշխատանքների պաշտպանությունը և վկայականների բաշխման հանդիսությունը:

Հստ Հոգևոր Ճեմարանի ծրագրի, այն ուսանողները, որոնք հաջողությամբ հանձնում են իրենց ավարտական քննությունները, ներկայացնում են նաև Հոգևոր Ճեմարանի վերատեսչության կողմից հանձնարարված աստվածաբանական, եկեղեցա-պատմական, մատենագիտական որևէ թեմայի շուրջ գրված դիպլոմային աշխատանք, 40—50 մեքենագրված էջերի ծավալով:

1961—1962 թվականի շրջանավարտ սարկավազներից երկուսը ներկայացրել էին իրենց դիպլոմային աշխատանքները:

Զոհրապ սարկավազի նյութն էր «Հայ երաժիշտ վարդապետները Ե—Ժ դար», իսկ Կարպիս սարկավազի թեման էր «Ս. Գրիգոր Նարեկացու մատենագրական վաստակը»:

Վերատեսչի նախագահության տակ կազմված քննիչ հանձնաժողովը, ծանոթանալուց հետո ներկայացված դիպլոմային աշխատանքներին, ապրիլի 2-ին նշանակում է դիպլոմների հրապարակային պաշտպանություն:

Վերատեսչի գլխավորությամբ քննիչ հանձնաժողովը (գերաշնորհ Տ. Ասողիկ եպիսկոպոս Ղազարյան, Արթուր Հատիտյան, Պարգե Շահբազյան) վարում է նաև դիպլոմների կանոնավոր պաշտպանությունը:

Երկու շրջանավարտ սարկավազները փայլուն հաջողությամբ պաշտպանում են իրենց դիպլոմային աշխատանքները, պատասխանելով մի շարք հարցերի:

Վերջում քննիչ հանձնաժողովի դիտողություններն ու գնահատականները հրատարակում է վերատեսուչ սրբազանը, խնդրելով Վեհափառ Հայրապետի օրհնությունները Հոգևոր Ճեմարանի և նոր շրջանավարտների վրա:

Այնուհետև շրջանավարտները աջահամբուլով Վեհափառ Հայրապետից ստանում են իրենց վկայականները, ներկաների բուռն ծափերի ներքո:

